



Inatsisartunut ilaasortamut  
Mariane Paviasen  
Inuit Ataqatigiit

04-04-2024  
Sags nr 2024 - 2723  
Akt. id. 23852244

Postboks 260  
3900 Nuuk  
Tlf. (+299) 34 50 00  
Fax (+299) 34 63 64  
E-mail: isn@nanoq.gl  
www.naalakkersuisut.gl

## **§ 37 naapertorlugu apeqqut nr. 019-imut utoqqalinersianik appariartuaartitsisarnerup peerneqarnissaa pillugu akissuteqaat**

Asasara Mariane Paviasen

Apeqqutinut qujanaq. Naalakkersuisut ajuusaarutigaa akissuteqarnissamut piffissaq sivisooq atorneqarmat. Apeqqutit ataasiakkaarlugit allaqqinneqarput, akissutaannik malitseqartillugit.

- 1. Utoqqalinersiaqarneq pillugu Inatsisartut inatsisaat pillugu Namminersorlutik Oqartussat nalunaarutaat § 10 imm. 2-mi utoqqalinersiaqartup aappaqarpallu ukiumut ilanngaataannngitsumik isertitarineqarsinnaasut killeqartinneqarput. Utoqqalinersiallit isertitaqassusaat apeqqutaatinnagu utoqqalinersiat tunniunneqartarnissaat qanoq aningaasatigut kinguneqassava?**
  - a. Utoqqalinersiaqartumut kisimiittumut, pisortanut aningaasatigut allaffissornikkullu kingunissaat nassuiaqquneqarput.**

Ukiuni tulliuuttuni utoqqaat amerliartornerisa utoqqalinersianut aningaasartuutit qaffatsittussaavaat. 2024-mi 528 mio. kr-it immikkoortinneqarput. Utoqqalinersianut aningaasartuutit 2025<sup>1</sup>-mi 541 mio. kr-inut qaffariissapput.

Naalakkersuisut isumaqarput oqallinnerni imatut ittuni kisitsisit eqqortut atorneqartariaqartut. Taamaattoq naatsorsuineq eqqortoq ugartorneqartoq annertuumik nalorninartortaqarpoq. Naalakkersuisut piaarnerpaamik eqqortumik akissuteqarusupput, kisianni naalakkersuisoqarfik § 37 naapertorlugu apeqqummut imaluunniit 2024-mi Inatsisartut upernaakkut ataatsimiinneranni immikkoortoq 50-imut piffissarititaasut iluanni eqqortumik akissuteqarsinnaanngilaq. Taamaattumik Naalakkersuisut allannguutissatut siunnersuummik saqqummiussipput, naatsorsuineq piaarnerpaamik naammassinissaannut Naalakkersuisut peqquneqassasut.

Taamaattoq naatsorsuigallannerit paasinarsisippaat, utoqqalinersianit isertitanut nalimmassaaneg peerneqarpat, december 2023-miit kisitsisit tunngavigalugit aningaasartuutiniq siumut naatsorsuinerup

<sup>1</sup> Taakkunangga aningaasartuutit 90 %-ii nunatta karsianit matussuserneqassapput.



takutikkaat, tamatuma utoqqalinersianut aningaasartuutit 2025-mi 69 mio. kr-inik qaffassasut aamma 2026-mi 74 mio. kr-inik qaffassasut naatsorsuutigineqarluni. 2036-p naanerata tungaanut aningaasat taakkua 109 mio. kr-inut qaffassagatinneqarput. Tamatumani aningaasat naleerukkiartornerat eqqarsaatigineqanngilaq – erniaat eqqarsaatigigaanni aningaasat qaffasinnerugaatsiassallutik. Aningaasartuutit annertusiat ukiuni tulluuttuni utoqqalinersianut aningaasartuutit annertuut saniatigut ilanngunneqassapput. 2024-mi innuttaasut siumut naatsorsorneqarnerat nutartigaq, naatsorsuineramik allannguisussa, naatsorsuutigineqarpoq.

**b. Utoqqalinersiaqartumut aappaqartumut pisortanut aningaasatigut kingunissaat nassuiaqquneqarput.**

1.a-mut akissut innersuussutigineqarpoq.

**c. Naalakkersuisut isumaqarpat inuit 67-ileereersumasut utoqqalinersiatigut ilannartuunneqanngikkaluarlutik sulisinnassariaqartut?**

Naalakkersuisut utoqqaat pillugit periusissiakkut aalajangerput, utoqqalinersianik aqqissusseqqinneq pillugu aallarnisaalluni oqallittoqassasoq, paasiuminarnerulerneranik aamma utoqqarnut suliffeqarnermut ilaaginnarnissamut orniginarnerulersitsinermik qulakkeerinnittussa. Taamaattoq malittarisassat maannakkut atuuttut inuiaqatigiinni naligiinnermik qulakkeerinneqataapput. Eqimattanut isertitaqarnerpaanut ilanngaasarneq peerneqassappat, naligiinnginneq annertuumik qaffattussaavoq. Inuiaqatigiinni pisuujunerpaat suli pisuujunerulissapput. Taamatut aamma pisoqarpoq, pilersuisussaaqatigiinneq 2023-mi Inatsisartut ukiakkut ataatsimiinneranni peeratsigu. Taamaattoq Naalakkersuisut peqatigalugu isumaqarput, utoqqalinersiallit sulerusuttut taamaaliornissamut periarfissaat pitsaanerpaassasut pingaaruteqarmat. Taamaattumik Naalakkersuisut utoqqalinersiallit isertitaannut killigititap peerneqarnissaanut siunnersuut utoqqalinersianik aqqissusseqqinnermi suliaqarnermut ilanngukkusuppaat.

Inussiarnersumik inuulluaqqusillunga

Jess Svane